

*Graf Hugo von Montfort, **Wolfhart [V.] von Brandis** und Peterman von Raron bestätigen die durch Ulrich von Matsch erfolgte weitere Bezahlung von 700 Gulden an die noch geschuldete Geldsumme von 1'900 Gulden.*

*Or: SLA, Schlossarchiv Churburg, Kasten A, Nr. 277. – Perg. – zwei Siegel anhängend. – Vermerk auf der Rückseite: Graf Hug von Montfort quittiert | den grafen von Metsch vmb 700 fl. | 1456.
Regest: LUB II (cg) n. Thommen IV, Nr. 182, S. 188.; Ladurner, Matsch, Heft 17, S. 223.
Druck: Thommen IV, Nr. 182, S. 188. (Auszug).*

^{a)}Wir nachbenempton graf Hug von Montfort¹, herr z^u Rottenuels², als ain gerhab vnd trager mins vettern | graf Wilhelms von Montfort³, **Wolfhart von Brandis**⁴ der elter vnd Peterman von Raro⁵, baid frÿen, ver- | gechent offennlich vnd t^und kundt menglichem mit dem brief, als vns der wolgeborn vogt V^olrich der jung | von Metsch⁶, graf z^u Kirchberg⁷, vnser lieber swager vnd o^ham, siben hundert rinsch guldin vf Sant Thorothea | tag nechst vergangen z^u geben vnd ze bezalen gewessen, ist nach lut vnd sag ains schultbriefs, der wisst | vnd sait vmb dr^u tusent rinsch guldin vf jeglich zil vnd tag vns darumb von im daruber gegeben, bekennen | wir all vnderschaidenlich in manss, also wir obgeschriben stand mit dem brief das vns der obgenant vogt V^olrich | von Metsch als vmb die obgenanten siben hundert rinsch guldin, so er vf den nechsten vergangen Sant Thorothea | tag geben solt, g^utlichen vnd tugentlichen darumb vssgericht, geret, geben vnd bezalt nach vnserm willen | vnd ben^ugen, vnd darumb so lassen vnd sagen wir, obgenanter graf Hug von Montfort, f^ur mich vnd den egenanten | minen vettern graf Wilhelmen vnd ich, **Wolfhart von Brandis**, f^ur mich vnd alle min s^un vnd ich, Peterman | von Raro, f^ur mich vnd o^hch wir all in manss, als wir obgeschriben stand, f^ur alle vnser erben, den obgenanten vogt | V^olrichen von Metsch vnd alle sin erben der obgenanten siben hundert rinsch guldin g^entzlich vnd gar quit ledig | vnd los, in kraft dis briefs, b^y vnsern g^uten, tr^uwen vngeuarlich, doch der vssstenden vnd vngewerten summ, | so denn noch vnbezalt vssstat, nach vsswisung des egenanten hoptbriefs in der vssstenden summ vnd an pen hinf^ur, | ob es darz^u kompt vnschedlich vnd vnuergriffen, vnd des alles z^u g^utem vrk^und der warhait jetzo vnd | hernach, so habent wir, obgenanten graf Hug von Montfort vnd **Wolfhart von Brandis**, baid vnssre insigel | f^ur vns den egenanten von Raro vnd f^ur all vnser erben offennlich lassen hengken an disen brief, darunder | wir vns, vnsern vettern graf Wilhelmen vnd och ich, benanter **von Brandis**, f^ur all min s^un vnd den egenanten | von Raro vnd all vnser erben, aller obgenanter ding vnd sachen vestencklich verschriben vnd verbunden | habent. Geben vf den nechsten zinstag nach des Hailigen Cr^utz tag im mayen nach Cristus | gep^urt verzeihen hundert vnd im sechs vnd f^unftzigostem jare |

^{a)} *Initiale W xx cm.*

¹ Hugo XIII. v. Montfort-Tettnang, 1440-†1491. – ² Rothenfels, Gem. Immenstadt i. Allgäu, Bayern (D). – ³ Wilhelm VIII. v. Montfort-Tettnang, 1447-†1483. – ⁴ Wolfhart V. v. Brandis, 1408-1459. – ⁵ Petermann II. v. Raron, *um 1405-†1479. – ⁶ Ulrich [IX.] v. Matsch, 1444-†1480/81. – ⁷ Kirchberg an der Iller, BW (D).